

## **Radyo an Norvys**

(<http://www.dasunys.net/podcast.htm>)

**Titel:** Nowodhow an seythun (10/10/07)

**Auctour:** Matthew Clarke

**Dydh:** 10 Hedra 2007

**Pesyans:** 3:16

Matthew Clarke ov hag ottomma nowodhow an seythun.

\*\*\*\*

Yma senedhor Westminster rag Kernow Soth Est owth holya senedhor Truru ha Sen Austell.

Colin Breed re dherivas y vodh a asa y soedh wosa an nessa dewisyans.

Matthew Taylor a leveris dhyn bos edhomm a spena moy a dermyn gans y deylu.

Byttegyns, ny wrug Mester Breed keswel yndellna.

Ev a grys y vos re goth mars eus dewisyans yn dew-vil-ha-naw.

An senedhor re oberis a-barth y ranndir rag deg blydhen ha kewsel yn krev a-barth tiogyon ha gonisysi a Borth Dewnans.

\*\*\*\*

Yth eson ni ow tyski braster an somenn rag gul unn konsel rag Kernow oll.

Bys y'n eur ma, ogas dhe dhew gans mil re beu spenys.

Mes yma kostennow pella dell glywyn.

Yma Konsel Pennwydh ow spena hwetek warn ugens mil peuns rag gorra kas dhe'n lys lagha.

Pennsoedhek Pennwydh Jim McKenna a grys bos edhomm a spena pypm-warn-ugens mil peuns moy.

Yma tus erell a-hys Kernow ow kovynn mars yw hemma skoellyans meur.

I a garsa gweles arghans an par ma usys rag gonisyow rag tus edhommek.

\*\*\*\*

Yma gwylaskaroryon ow kwerrya erbynn arwoedhyow arta.

An prys ma, ymons i ow peyntya war arwoedhyow 'Discover England'.

I re worras lies namm du ha kudha rosennow rudh Sowsnek.

\*\*\*\*

Yth eson ow mires orth an rugbi lemmyn...

Pennseythun dewl o dhe'n Para-Oll-Du.

I eth dhe Aberplymm ha gwari erbynn Albion yn Kenedhlek Onan.

Byttegyns dhe hanter-termyn y hevelis bos menydh re vras ragdha.

An vebyon Dhewnansek a gavas deg poynt warn ugens dhe dravyth.

An skor o gweth dhe leun-dermyn... hanter-kans dhe Albion... saw seyth dhe Lannstefan.

Gwell o an bennseythun dhe'n Vorladron.

I a skoryas deg-poynt-warn-ugens dhe dri-foynt-warn-ugens erbynn an Exeter Chiefs.

Karesk a dheuth dhe bark gwari Kammbroonn y'n seythun y tallathas gwari dhe-les dhe Gernewegoryon.

Yma govynnow a-dro dhe'gan taves ni yn towlenn an Vorladron pub pennseythun.

An klub rugbi a vynn kesoberi gans soedhva an yeth ha gul bri an ertaj, keffrys ha'n gwari.

Elizabeth Stewart yw ordenores an kesstrif...

[CLIP]

Ha dhe'n nivel kenedhlek dew... Rysrudh a gollas erbynn Blackheath... peswardhek-warn-ugens dhe beswardhek.

\*\*\*\*

Ha henn yw diwedh agan boelletin nowodhow bys yn nessa seythun.